

四上背誦論語為政篇

為政第二 共二十四章

- 2-1 子曰：「為政以德，譬如北辰，居其所而眾星共之。」
- 2-2 子曰：「詩三百，一言以蔽之，曰思無邪。」
- 2-3 子曰：「道之以政，齊之以刑，民免而無恥；道之以德，齊之以禮，有恥且格。」
- 2-4 子曰：「吾十有五而志於學；三十而立；四十而不惑；五十而知天命；六十而耳順；七十而從心所欲，不踰矩。」
- 2-5 孟懿子問孝。子曰：「無違。」樊遲御，子告之曰：「孟孫問孝於我，我對曰：『無違。』樊遲曰：『何謂也？』子曰：『生，事之以禮；死，葬之以禮，祭之以禮。』」
- 2-6 孟武伯問孝。子曰：「父母唯其疾之憂。」
- 2-7 子游問孝。子曰：「今之孝者，是謂能養。至於犬馬，皆能有養；不敬，何以別乎？」
- 2-8 子夏問孝。子曰：「色難。有事，弟子服其勞，有酒食，先生饌，曾是以為孝乎？」
- 2-9 子曰：「吾與回言終日，不違如愚。退而省其私，亦足以發，回也，不愚！」
- 2-10 子曰：「視其所由，觀其所由，察其所安，人焉廋哉！人焉廋哉！」
- 2-11 子曰：「溫故而知新，可以為師矣。」
- 2-12 子曰：「君君，子不器。」
- 2-13 子貢問君君子。子曰：「先行其言，而後從之。」

2-14 子曰：「君子周而不比，小人比而不周。」

2-15 子曰：「學而不思則罔，思而不學則殆。」

2-16 子曰：「攻乎異端，斯害也已。」

2-17 子曰：「由，誨女知之乎！知之為知之，不知為不知，是知也。」

2-18 子張學干祿。子曰：「多聞闕疑，慎言其餘，則寡尤；多見闕殆，慎行其餘，則寡悔。言寡尤，行寡悔，祿在其中矣。」

2-19 哀公問曰：「何為則民服？」孔子對曰：「舉直錯諸枉，則民服；舉枉錯諸直，則民不服。」

2-20 季康子問：「使民敬、忠、以勸，如之何？」子曰：「臨之以莊，則敬；孝慈，則忠；舉善而教不能，則勸。」

2-21 或謂孔子曰：「子奚不為政？」子曰：「書云：『孝乎，惟孝友于兄弟。』施於有政，是亦為政，奚其為為政？」

2-22 子曰：「人而無信，不知其可也。大車無輓，小車無軌，其何能以行之哉？」

2-23 子張問：「十世可知也？」子曰：「殷因於夏禮，所損益可知也；周因於殷禮，所損益可知也；其或繼周者，雖百世可知也。」

2-24 子曰：「非其鬼而祭之，諂也。見義不為，無勇也。」